

MANIFESTAZIOA BILBON. 'Euskaldunak direlako, guztion artean euskal presoak Euskal Herrira' izan zen leloa

Milaka lagunek euskal presoak Euskal Herrira ekartzeko eskatu dute Bilbon

Euskal presoak bisitatzeraz zihoazela errepidean hildako guztiak gogora ekarri zituen Senideak-Gureak elkarteak

Asier Iturriagaetxebarria-Iban Ocio | BILBO

Senideak-Gureak taldeak deituta, milaka lagun elkartu ziren atzo Bilboko kaleetan euskal presoak Euskal Herrira ekartzea eta sakabanaketa amaitzea eskatzeko. Avilako Brieua espetxera bisita bat egitera zihoazela, Iñaki Saez eta Asier Heriz hil egin ziren auto istripuan, joan den larunbatean. Horren ostean, manifestazio nazionala deitza erabaki zuen Senideak-Gureak elkarteak *Euskaldunak direlako, guztion artean euskal presoak Euskal Herrira* lelopean.

Milaka lagunek erantzuna eman zioten Senideek egindako deiari. Antolatzaileek ez zuten zehaztu nahi izan kopurua, baina datu adierazgarria da manifestazioaren burua Zabalburu plazara ailegatu zenean —Autonomia kalea zeharkatu ostean— azken manifestariak Aita Donostia plazatik irten zirela.

Manifestarien artean euskal politikagintza, sindikalismo eta kulturgintzako hainbat kide izan ziren. Batasuneko Arnaldo Otegi, Joseba Permach, Fernando Barrena, Josu Urrutikoez, Koldo Gorostiaga, Jone Goirizelaia eta Imanol Alvarez; EAKo Legebiltzarkide Martin Aranburu; EB-IUko zuzendari-zako kide Oskar Matute; ELA sindikatuko komunikazio arduradun German Kortabarria; LAB sindikatuko idazkari nagusi Rafa Diez Usabiaga; EHNEko idazkari nagusi Maite Aristegi; ESAITEko Martxel Toledo eta Ritxi Mendiguren; Xabier Amuriza bertsolaria eta Patxi Bisquert aktorea, besteak beste.

Azpimarratzekoa da manifestarien artean Ernesto Alberdi zornotzarra izan zela. Espainiako kartzeletan 21 urte egin eta gero, atzo arratsaldean omenaldia egin zioten bere jaioterrian.

Euskal preso senideak, manifestazioaren buruan

Arratsaldeko 17:00etarako zegoen deituta manifestazioaren irteera. Manifestazioaren buruan 600 lagun inguru joan ziren. Bakoitzak euskal preso edo iheslariren baten argazkia zera-man. Atzean lehenengo pankarta joan zen. Manifestazioaren leloa idatzita zeukan pankartari eusten euskal presoak bisitatzeraz zihoazela errepidean hilda-

ERANTZUN ZABALA

Euskal politikagintzako eta sindikatueta hainbat lagun izan ziren manifestazioan

JENDETZA HANDIA

Manifestazioaren burua Zabalburura heltzean, Aita Donostiak irten ziren azken manifestariak

koen senideak izan ziren. Gero, bigarren pankarta joan zen. Manifestazioa igartzeko zain errepidearen bazterretan zeuden txaloz agurtu zituzten. Manifestazio isila izan zen, baina une batzuetan euskal presoak Euskal Herrira ekartzearen aldeko oihuak entzun ziren.

Manifestariak 18:15 aldera heldu ziren udaletxe aurrera. Bertan txalapartarien eta Ondarroako irrintzi taldearen soinuek agurtu zituzten. Ekitaldi politikoaren aurretik, Xabier Amurizak Lourdes Txurruka Brieuan dagoen euskal presoak idatzitako bertsoa kantatu zuen. Behin ekitaldi politikoa amaituta, eta manifestazioa agurtzeko, Euskariak abesbatzak *Kalera, kalera* kantua abestu zuen.



XOUSE SIMAL

Milaka jende bildu zituzten senideek Bilbon, sakabanaketa salatu eta preso euskal herriratzea aldarrikatzeko. Argaz...

SENIDEEN BALORAZIOA

«Sufrimenduaren salerosketa» gogoan

Senideetako kide Ramon Gaztelumendik egin zituen euskal preso eta iheslari politikoaren sendien bozeramaile lanak atzo. Eledunak, jardunari ekin eta berehala, sakabanaketaren ondorioz errepideetan zendu diren guztiak ekarri zituen gogora: «Ezin ahantzi ditzakegu bisitan abiatutakoak eta, gaur, gure artean ez daudenak. Ezin ahaztu gaur ere, etxetik urrun, ziega beltz haietan dituzten preso kutunak». Ondoren, Senideak-Gureak elkarte osatzen dutenek «gorroto eta mendeku sentimenduak uxatu» nahi dituztela aipatu zuen Gaztelumendik, errepresaliatu eta sendiek bizi duten egoera «krudela baino okerragoa» izanda ere.



XOUSE SIMAL

Presoen argazkiak, manifestazio buruan.

«Sufrimenduaren erabilera edo salerosketa» onartzen ez dutela jakinarazi zuen bozeramaileak. «Inork ez dezala sufrimendua instrumentalizatu!», berretsi zuen. «Era batera edo bestera denok pairatzen

ditugu belaunaldiz belaunaldi bizirik dirauen gatazka politikoaren ondorioak».

Gaurko egoera luzaroan ez iraunarazteko irtenbideen inguruan ere mintzatu zen Gaztelumendik: «Jorratu beharreko bide berrien jomuga, eskubide guztien onarpenarena behar luke, inongo bereizketarik gabe». Eledunaren esanetan, «euskal gizartearen nahiaren errespetuan» dago gako. «Gizartearen borondatea aintzat hartzen den heinean, eskubide guztiak errespetatuak izango direlakoan gaude», azaldu zuen Senideetako kideak.

Protestaldi isilean, presoaren eskubideen defentsan Euskal Herriko sektore eta jende anonimo diferentea elkartu izana go-raipatu zuen. «Utz ditzagun bazterrean gure arteko ezberdintasunak, eta ekin diezaiozun euskal presoaren aldeko elkarlanari», bukatu zuen Gaztelumendik.